

प्रादेशिक समाचार  
आकाशवाणी जयपुर-अजमेर  
दिनांक 15.08.2024 समय: 18.45 बजे

- प्रधानमंत्री नरेन्द्र मोदी लाल किले री प्राचीर सूं स्वतंत्रता दिवस माथे आपरे संबोधन मांय कह्यो-140 करोड नागरिक एक संकल्प ले र चाले तो देश ने 2047 ताई विकसित राष्ट्र बणा सके है।
- श्री मोदी महिलावां रे खिलाफ हिंसा रे बधता मामला माथे चिंता जताई अर कह्यो - अपराधियां ने बेगी ऊं बेगी सजा देयी जाणी चाहिजे।
- प्रदेशभर मांय स्वतंत्रता दिवस समारोहपूर्वक मनायो गयो-कई ठोडा माथे बिरखा रे बावजूद आजादी रे जश्न रो उच्छास।
- राज्य मांय केई संभागां मांय आज भी तेज बरसात-17 अगस्त रे पाछे बिरखा रो दौर धीमो पडणे रा आसार।

00000

देशभर मांय आज 78वां स्वतंत्रता दिवस हरक अर उच्छास रे साथे मनायो गयो। प्रधानमंत्री नरेन्द्र मोदी इण मौके माथे नुवी दिल्ली मांय लाल किले री प्राचीर सूं राष्ट्रीय ध्वज फहरायो अर राष्ट्र ने संबोधित कर्यो। प्रधानमंत्री बोलता थकां कह्यो के 140 करोड नागरिक एक संकल्प लेर चालें तो देश ने 2047 ताई विकसित राष्ट्र बणा सके हैं। प्रधानमंत्री कह्यो के सेमीकन्डक्टर उत्पादन मांय वैश्विक नेतृत्व हासिल करणे, आयात माथे निर्भरता कम करणे अर प्रौद्योगिकी रे खेतर मांय आत्मनिर्भरता बधाणे री भारत री प्रतिबद्धता रो उल्लेख कर्यो। प्रधानमंत्री भारत रे विकास री दिशा तय करणे वाळे भविष्य रे लगस रे बारा मांय विस्तार सूं बतायो। वणां विनिर्माण, गेमिंग अर डिजाइनिंग समेत न्यारा-न्यारा खेतरां मांय देश ने वैश्विक नेता रे रूप मांय थापित करणे खातिर नवाचार री जरूरत माथे बल दियो।

.....

प्रधानमंत्री कह्यो के केन्द्र सरकार ईज ऑफ लिविंग खतिर मिशन मोड मांय काम कर री है। वणा नियमित आंकलन अर बुनियादी सुविधावां मांय सुधारा सूं शहरी खेतरां मांय जीवन री गुणवत्ता बधाणे री बात कही। श्री मोदी महिलावां पर हो रिया अत्याचारां माथे बोलता थकां कह्यो के महिलावां रे साथे अपराधां री बेगी सूं बेगी जांच अर दोषियां ने बेगी ही सजा होणी चाहिजे। वणां कह्यो के मीडिया मांय दुष्कर्म री घटनावां तो उजागर होवे है पण दोषियां ने मिलण वाळी सजा रो घणो प्रचार नी होवे है। वणां पैरिस पैरालंपिक मांय भाग लेवण जा रिया खिलाडियां ने शुभकामनावां भी दी।

00000

स्वतंत्रता दिवस आज प्रदेशभर मांय समारोहपूर्वक मनायो गयो। रिमझिम बरसात री झडी रे बीचे राज्य स्तरीय मुख्य जळसो राजधानी जयपुर रा सर्वाइमानसिंह स्टेडियम माथे राख्यो गयो, जठे मुख्यमंत्री भजनलाल शर्मा राष्ट्रध्वज फहरायो अर परेड रो जायजो कर्यो। इण मौके माथे मुख्यमंत्री प्रदेशवासियां सूं बोलता थकां कह्यो के राज्य सरकार प्रदेश रा सगळा वर्गा रे कल्याण खातिर प्रतिबद्ध है। वणा राज्य सरकार री उपलब्धियां गिणाता थकां कह्यो के प्रदेश ने विकसित राज्य बणावण खातिर लगेतार काम कर्यो जा रह्यो है। श्री शर्मा हर नागरिक सूं प्रदेश री विकास यात्रा मांय सहभागी बणने रो हेलो कर्यो। वणां कह्यो के सगळा मिल र राजस्थान ने प्रगति री नुवी ऊचाईयां माथे ले जाणे खातिर काम करां।

.....

मुख्यमंत्री कह्यो के सरकार रिक्त भर्तियां ने मिशन मोड माथे पूरा करणे मांय जुटी है। साथे ही पेपरलीक करण वाळा रे खिलाफ भी सख्त कार्यवाही करी जा री है। वणां कह्यो न्यारा-न्यारा

महकमा री कई सेवावां रो लाभ आम नागरिकां ने 24 घंटा रे मांय मांय दियो जाणो पक्को कर्यो जावेला।

इण रे चालता न्यारा-न्यारा खेतरां मांय उत्कृष्ट अर सराहनीय सेवावां देवण वाळी हस्तियां ने भी पुरस्कृत कर्यो गयो। जळसा मांय मुख्यमंत्री राज्य री दो महिला पुलिस अहलकारां ने राष्ट्रपति पुलिस पदक सूं नवाज्यो। इण मांय अतिरिक्त महानिदेशक स्मिता श्रीवास्तव अर विनीता ठाकुर भेळी है। इण रे अलावा श्री शर्मा जोधपुर रा जिला कलेक्टर गौरव अग्रवाल साथे उत्कृष्ट काम करण वाळा 9 अहलकारां अर कार्मिकां ने योग्यता प्रमाण पत्र सूं नवाज्यो। इण मौके माथे न्यारा-न्यारा सांस्कृतिक कार्यक्रमं री प्रस्तुतियां व्ही।

जळसा मांय प्रशासनिक, पुलिस अहलकार अर आमजन मौजूद रिया। इणसूं पैल्यां मुख्यमंत्री अमर जवान ज्योति माथे फूल चढा र शहीदां ने श्रिद्धाजलि दी। श्री शर्मा आपरे आवास बडी चौपड अर सचिवालय मांय भी झंडो फहरायो।

आजादी री सालगिरह रो जश्न प्रदेश रा सगळा जिला अर संभागां मांय भी हरक अर उच्छास सूं मनायो गयो।

राज्यपाल हरिभाऊ किसन राव बागडे राजभवन मांय तिरंगो फहरायो। इण मौके माथे वणां युद्ध स्मारक रे रूप मांय टैंक-टी-55 रो लोकापर्ण कर्यो। उपमुख्यमंत्री दिया कुमारी दौसा मांय अर उपमुख्यमंत्री डॉ. प्रेमचन्द बैरवा दूदू मांय राष्ट्र ध्वज फहरायो। अलवर मांय वन अर पर्यावरण मंत्री संजय शर्मा, सिरोही मांय पंचायतीराज अर ग्रामीण विकास राज्य मंत्री ओटाराम देवासी, बीकानेर मांय खाद्य अर नागरिक आपूर्ति मंत्री सुमित गोदारा, टोंक मांय जलदाय अर भूजल मंत्री कन्हैया लाल चौधरी अर भीलवाड़ा मांय राजस्व राज्य मंत्री विरेन्द्र सिंह झंडो फहरायो। वठीने पाली मांय देवस्थान मंत्री जोराराम, फलौदी मांय चिकित्सा अर स्वास्थ्य मंत्री गजेन्द्र सिंह खींवर, भरतपुर मांय उद्योग अर खेल मामलात मंत्री कर्नल राज्यवर्द्धन सिंह राठौड़ अर जोधपुर मांय विधि अर संसदीय कार्य मंत्री जोगाराम पटेल, सवाईमाधोपुर मांय कृषि मंत्री किरोड़ी लाल मीणा तिरंगो फहरायो। सीकर मांय तेज बिरखा रे बावजूद स्वतंत्रता दिवस जळसे रो उच्छास बरकरार रियो, सांस्कृतिक कार्यक्रम प्रस्तुत कर रह्या स्कूली टाबरां मांय खासो जोश निजर आयो।

00000

प्रदेश मांय आज भी कई ठोड़ा माथे बिरखा व्ही। जयपुर अर आसे-पासे रे इलाकां मांय सुंवारे सूं ही रिमझिम बिरखा रो दौर जारी रियो। बारिश सूं शहर रे निचले इलाकां मांय पाणी भर गयो। हनुमानगढ मांय मौसम रो मिजाज बदल्यो अर दिन मांय झमाझम बरसात व्ही। झालावाड अर दौसा मांय सुंवारे सूं ही हल्की बिरखा रो सिलसिलो चालतो रियो। बालोतरा मांय भी बूदाबांदी व्ही। बीकानेर, करौली मांय दोपहरा पाछे बिरखा व्ही। जोधपुर अर आसे-पासे रा खेतरां मांय बिरखा रे चालता मौसम सुहावणो बण्योडो है। बारां मांय रूक-रूक र व्ही बरसात सूं जनजीवन प्रभावित व्ह्यो है।

जिला रा अंता विधानसभा खेतर रा बैंगना अर हापाहेडी गांव मांय स्वतंत्रता दिवस मनावण गया टाबर स्कूल मांय फंस गया, जकाने गांव रा लोग ट्रेक्टर रे जरिये बारे निकाळ्यो। सीकर मांय आज जिला कलेक्टर कमर उल जमान चौधरी जल भराव वाळा इलकां रो दौर कर्यो अर अहलकारां ने जरूरी दिशा निर्देश दिया। अजमेर सूं म्हारी संवाददाता बतायो के वठे तेज बिरखा रे कारणे निचले इलकां मांय घणो पाणी भर गयो है।

000000

प्रदेश रा घणकर बांधां अर जल स्त्रोतां मांय पाणी री आवक बण्योडी है। करौली रा पांचना बांध सूं गंभीर नदी मांय आ रिह्यो पाणी सूं भरतपुर रे बयाना थापित समोगर पुल माथे चादर चाल री है। नदी रे आसे-पासे रे गांवां ने सावचेती बरतने रो कह्यो है। वठीने पांचना बांध रो पाणी केवलादेव नेशनल पार्क मांय पहुंचणे सूं झीलां मांय पाणी री चौखी आवक व्ही है। म्हारा टोंक संवाददाता बतायो के बीसलपुर बांध मांय जल स्तर 312 दशमलव 81 आरएल मीटर दरज कर्यो गयो है। मौसम केन्द्र जयपुर रे मुजब प्रदेश मांय बीत्या 24 घंटां मांय केई ठोड़ा माथे भारी सूं घणी भारी बिरखा दरज करी ज्यी। जयपुर मांय सबसूं बत्ती 15 सेंटीमीटर बिरखा मापी ज्यी। मौसम महकमो आज अजमेर भीलवाड़ा, बूंदी, जयपुर, टोंक, नागौर अर पाली मांय भारी बिरखा रो ऑरेंज अलर्ट जारी कर्यो है। वठीने केई दूजा जिला मांय भी भारी बिरखा री चेतावनी दी है। केंद्र रा निदेशक राधेश्याम शर्मा बतायो के 17 अगस्त रे पाछे बिरखा रो दौर धीमो पड़ने री आस है।

.....

00000

खैरथल तिजारा रा मुंडावर गांव रे कने एक बाघ पांच मोट्यारा माथे हमलो कर दियो। इण मांय सूं तीन गंभीर घायला ने अलवर रेफर कर्यो गयो है। वन महकमा रा अहलकार ग्रामीणां ने सावचेत रहणे रो कह्यो है। अहलकारां बतायो के ओ बाघ एसटी दो तीन शून्य तीन (2303) है जको सरिस्का टाइगर रिजर्व सूं निकळ र इण खेतर मांय पहुंच्यो है। ओ बाघ सात म्हीना पैला भी रेवाडी होते हुए हरियाणा पहुंच्यो हो।

000

हज यात्रा-2025 रा ऑनलाइन आवेदन पत्र भरने खातिर जयपुर रा हज हाउस मांय ई-सुविधा केन्द्र बणायो गयो है। राजस्थान स्टेट हज कमेटी रा अधिशाषी अहलकार डॉ. महमूद अली खान बतायो कि आवेदन पत्र भरणे अर वां री जांच रे पाछे हज हाउस मांय कवर नम्बर जारी कर्या जावेला। वणां कह्यो के हज कमेटी ऑफ इंडिया मुम्बई री वेबसाइट अर मोबाईल एप हज सुविधा माथे भी आवेदन पत्र भर्या जा सके है। डॉ. अली बतायो के हज जातरियां रे ब्लड गुप री जांच खातिर मेडिकल टीम री व्यवस्था भी करी ज्यी है। ध्यानजोग है के हज जात्रा रा 9 सितंबर ताई आवेदन कर्या जा सके है।

0000

प्रधानमंत्री नरेन्द्र मोदी ई महीना री 25 तारीख, दीतवार ने आकाशवाणी ऊं प्रसारित कर्या जावण वाळा खास कार्यक्रम मन की बात मांय विचार बतावेला। आ हर महीना प्रसारित कर्या जावण वाळा ई कार्यक्रम री 113वीं कडी व्हेला। ई सारू आप मुफ्त नम्बर 1800 11 7800 माथे 23 तारीख ताई विचार अर राय भेज सको हो। इण रे अलावा नरेन्द्र मोदी एप अर माई जीओवी ओपन फोरम माथे ई विचार बताया जा सके है।

00000